



SEORANG kanak-kanak ditenangkan bapanya ketika menjalani saringan Covid-19 percuma di Flat Seri Sabah, semalam.

(6 Jun 2021) Harian Metro, P. 10

KEKANG VIRUS DALAM KOMUNITI

*Program saringan bersasar Covid-19
di Wilayah Kuala Lumpur bermula semalam*

Oleh Raja Noraina Raja
Rahim
rnoraina@hmetro.com.my

Kuala Lumpur

Program saringan komuniti bersasar Covid-19 untuk warga Wilayah Persekutuan Kuala Lumpur bermula semalam.

Ia bagi mengesan dan mengekang penularan pandemik itu dalam kalangan komuniti.

Program yang diadakan secara percuma oleh Kementerian Wilayah Persekutuan dengan kerjasama Dewan Bandaraya Kuala Lumpur (DBKL), Kementerian Kesihatan Malaysia (KKM), agensi kerajaan lain dan pihak swasta itu menggunakan Kit Ujian Pantas Antigen (RTK-Ag).

Ia menyasarkan penduduk di perumahan awam dan kampung tradisi yang mempunyai kepadatan penduduk tinggi.

Menterinya, Tan Sri Annuar Musa berkata, pada permulaan, empat lokasi dipilih iaitu Perumahan Awam (PA) Seri Sabah 3A dan 3B, PA Seri Pulau Pinang dan Seri Kota sebelum



SEORANG ibu membawa anaknya melakukan ujian saringan, semalam.

diperluaskan ke beberapa lokasi terpilih sekitar Lembah Klang serta Labuan.

"Ketika ini, ramai yang dikesan positif Covid-19 tanpa sebarang gejala. Individu terbabit tidak tahu dirinya positif seterusnya menyebabkan penularan dalam komuniti.

"Ada kes yang pesakit dapat tahu positif agak lambat,

ada juga kes berlaku kematian di rumah dan apabila dibawa ke hospital, barulah disahkan positif. Sebab itu kita ambil inisiatif buat saringan secara bersasar ini," katanya pada sidang media selepas meninjau program itu di PA Seri Sabah 3A di sini.

Turut hadir, Datuk Bandar Kuala Lumpur, Datuk

Seri Mahadi Che Ngah.

Sebanyak 27 Projek Perumahan Rakyat (PPR) dan PA sudah disenaraikan, malah 36 perumahan dan kampung tradisi lain sedang dikenal pasti bagi fasa saringan seterusnya.

Sementara itu, penduduk, Aidil Azhari, 38, berkata, dia membawa tiga anaknya berusia dua hingga lapan tahun menjalani ujian saringan Covid-19.

Juruteknik itu berkata, meskipun tiada ahli keluarga terdekat dan rakan sekerja yang dikesan positif sejak ini, dia mengambil langkah awal membuat pengesanan bagi memastikan keluarganya bebas pandemik itu.

Bagi pengurus restoran makanan segera, Siti Nurul Amirah Allahudin, 23, masyarakat perlu bertanggungjawab untuk tidak menjadi pembawa virus sehingga mendatangkan risiko kepada orang sekeliling.

"Apabila dapat tahu ada program saringan secara percuma di sini, saya bersama lima ahli keluarga ambil peluang ini. Tambahan pula, saya perlu keluar bekerja dan bimbang menjadi pembawa virus," katanya.